

Aðalfundur íþróttafélagsins Vestra

haldinn þriðjudaginn 30. apríl 2019 kl. 20 á Hótel Ísafirði

Á dagskrá fundarins voru hefðbundin aðalfundarstörf skv lögum félagsins.

1. Fundarsetning.

2. Kosning fundarstjóra og fundarritara.

Hjalti Karlsson, formaður Vestra, lagði til að Birna Lárusdóttir yrði kjörin fundarstjórinn. Samþykkt með lófaklappi. Birna tók við fundarstjórn og spurði fundarmenn hvort þeir gerðu athugasemd við boðun fundarins en engin athugasemd kom fram þannig að fundarstjóri dæmdi fundinn löglega boðaðan. Fundarstjóri bar fram tillögu um að Guðfinna Hreiðarsdóttir yrði kjörin fundarritari og var það samþykkt með lófaklappi.

3. Fundargerð síðasta aðalfundar lögð fram.

Sigurður Hreinsson lagði fram fundargerð síðast aðalfundar sem er aðgengileg á heimasíðu Vestra. Engar athugasemdir gerðar við fundargerðina.

4. Formaður félagsins gerir grein fyrir starfsemi aðalstjórnar á liðnu starfsári:

Inngangur

Þriðja starfsári íþróttafélagsins Vestra er nú lokið og má segja að félagið hafi slitið barnsskónum. Yfirbragð félagsins er að taka á sig mynd og innan fárra ára verðum við með fjölda iðkenda sem hafa aldrei stundað íþróttir fyrir annað félag en Vestra. Tíminn líður hratt og getur verið afstæður. Verkferlar innan félagsins eru að slípast, samskipti stjórna að mótast og reglur og umgjörð félagsins að taka á sig mynd.

Á öðrum aðalfundi aðalstjórnar Vestra, þann 7. maí 2018 voru eftirtaldir kosnir í aðalstjórn:

Til eins árs: Hjalti Karlsson, formaður

Tveggja ára: Guðni Guðnason

Gísli Jón Hjaltason

Sólrún Geirsdóttir

Varamenn eitt ár: Jónas Gunnlaugsson

Jóna Lind Kristjánsdóttir

Fyrir voru í stjórn: Guðfinna Hreiðarsdóttir

Sigurður Jón Hreinsson

Pétur Markan

Á fyrsta fundi nýrrar stjórnar þann 8. júní skipti stjórn með sér verkum á sama hátt og fyrsta starfsárið, þ.e. Guðfinna Hreiðarsdóttir varaformaður, Guðni Guðnason gjaldkeri og Sigurður Jón Hreinsson ritari. Á þriðja starfsári sínu kom aðalstjórn saman til fundar sjö sinnum að aðalfundi þessum meðtöldum. Auk þess voru haldnir tveir vinnufundir þar sem unnið var að viðbragsáætlun og ýmsum reglum félagsins. Fundað var eftir þörfum og aðstæðum en tölvusamskipti einnig nýtt til starfsins. Í þessari starfsskýrslu aðalstjórnar verður einungis tæpt á nokkrum viðfangsefnum stjórnarinnar. Vísast að öðru leyti í fundargerðir aðalstjórnar á heimasíðu félagsins og starfsskýrslur deilda.

Ný deild

Á árinu átti sér stað sá ánægjulegi atburður að kröftugt áhugafólk um hjólreiðar spurðist fyrir um möguleika þess að stofna hjólreiðadeild innan vébanda Vestra. Að sjálfsögðu var vel tekið í þá málaleitan og varð úr að deildin tók til starfa á síðasta ári. Lög Vestra gera hinsvegar ráð fyrir að nýjar deildir hefji störf innan s.k. almenningsdeildar þar til samþykkt er á næsta aðalfundi með formlegum hætti stofnun hennar. Undirbúningi þessa máls er lokið, stjórn hefur verið sett á laggirnar, reglugerð samin og stofnað til kennitölu. Því mun nú síðar á þessum fundi verða borin upp tillaga um formlega inngöngu hjólreiðadeildar Vestra og ber sérstaklega að fagna því.

Fjárhagur Vestra

Nú hafa allar deildir félagsins haldið sína aðalfundi og birt ársreikninga. Eins og allir vita er mikið verk og erfitt að afla íþróttafélögum fjár til rekstrar. Gríðarleg ferðalög og launakostnaður er þungur baggi og því þarf umhverfið að vera hagfellt til að endar nái saman. Samstæða Vestra velti á árinu 108 milljónum króna sem gríðarhá upphæð fyrir ekki stærra samfélag og má segja að rekstur Vestra á árinu 2018 hafi gengið nokkuð vel. Knattspyrnudeild skilar góðum rekstrarafgangi, blakdeild réttum megin við núllið en nokkrar blikur á lofti í rekstri körfuknattleiksdeildar. Annað árið í röð er deildin rekin með tapi, þó barna- og unglíngarráð hafi skilað góðri afkomu. Með jafn öflugt fólk að baki félaginu eru áhyggjur okkar þó ekki miklar og er það sannfæring okkar að framtíðin sé björt. Rekstur sunddeildar var lítil á árinu.

Fjölnota knattspyrnuhús

Eitt mikilvægasta hagsmunamál íþróttahreyfingarinnar í Ísafjarðarbæ er og hefur verið bætt aðstaða knattspyrnumanna. Um nokkurt skeið hefur verið stefnt að byggingu knattspyrnuhúss sem mun gjörbreyta aðstöðu knattspyrnumanna til hins betra. Hafa ber í huga að fleiri íþróttagreinar koma til með að njóta góðs af þessari uppbyggingu því fótbolti hefur notað u.þ.b. 33% af tiltækum tímum í íþróttahúsunum á Torfnesi og í Bolungarvík. Þar sem eftirspurn eftir tímum er langt umfram framboð munu aðrar íþróttagreinar bera meiri tíma úr bítum með tilkomu nýs húss.

Um hið væntanlega hús væri hægt að fjalla um í löngu máli og sýnist sitt hverjum. Hvernig hús, hvaða stærð, hæð þess, staðsetning og kostnaður. Ekki er ástæða til að fjölýrða um það hér, heldur fagna því að nú hyllir í að löngu tímabær uppbygging hefjist á Torfnesi.

Vallarhús

Á grundvelli samnings sem gerður var við Ísafjarðarbæ í desember 2017, um afnot félagsins af efri hæð Vallarhúss á Torfnesi, var í vetur unnið að hönnun fyrirkomulags félagsaðstöðu í húsinu og gerð kostnaðaráætlunar. Áætlunin var unnin í samstarfi við Tækniþjónustu Vestfjarða og hljóðaði uppá 14 milljónir. Innifalið í verkinu var málningarvinna, smíði, endurnýjun raflagna og ljósa, auk þriggja salerna og uppsetning eldhúsaðstöðu. Vinna hófst í húsinu í febrúar þó engir fjármunir væru tryggðir til verksins og ljóst að skipta þyrfti framkvæmdinni í áfanga. Nú í aprílmánuði lagði Ísafjarðarbær 1,5 milljón til verksins sem vissulega hefði mátt vera hærri upphæð en einnig höfum við notið stuðnings frá öflugum styrktaraðila félagsins og þökkum við kærlega fyrir það.

Fyrir sumarið er stefnt að því að ljúka við standsetningu salar en bíða til hausts með salerni og eldhúsaðstöðu. Félagsmenn úr öllum deildum félagsins hafa komið að vinnu í húsinu, þó knattspyrnumenn hafi dregið vagninn. Búið er að leggja nærri 300 klst. í þessa vinnu og vil ég hér með þakka þeim sem hönd hafa lagt á plóg.

Siðamál - Viðbragðsáætlun

Bæjarstjórn Ísafjarðarbæjar sendi á síðasta ári frá sér viljayfirlýsingu þess efnis að fjárveitingar til íþróttafélaga og annarra félagasamtaka sem bjóða upp á frístundaiðkun fyrir börn og unglínga, verði m.a. skilyrt því að félögin setji sér siðareglur og viðbragðsáætlanir.

Þótt slíkar áætlanir hafi ekki verið tilbúnar síðastliðið vor, setti aðalstjórn Vestra á laggirnar embætti trúnaðarmanns félagsins og tók Birna Lárusdóttir að sér verkefnið og hefur gegnt því síðan. Á haustdögum hófst svo vinna aðalstjórnar Vestra við jafnréttisáætlun, siðareglur og viðbragðsáætlun. Haldinn var vinnufundur laugardaginn 27. október með stjórnarmönnum í aðalstjórn, auk fulltrúa deilda. Fundarmenn skiptust í þrjá hópa sem unnu að mismunandi verkefnum. Að loknum vinnufundi lágu fyrir nokkuð skýr drög að jafnréttisáætlun og siðareglum en ljóst að viðbragsáætlun þarfnaðist meiri yfirlegu. Nokkuð lengi var beðið niðurstöðu starfshóps sem menntamálaráðherra skipaði um viðbrögð við kynbundnu ofbeldi. Nú í byrjun apríl lauk svo þessari vinnu Vestra og verða tillögur þessara þriggja hópa kynntar hér síðar á fundinum og þær bornar upp til samþykktar fundarins. Víða var leitað fanga í þessari vinnu, bæði hjá íþróttafélögum, samböndum og æskulýðshreyfingunni.

Starf deilda

Starf deilda var með blómlegum hætti að undanskilinni sunddeild en starf hennar hefur verið í lágmarki um nokkurt skeið. Deildin hefur þó staðið fyrir sundæfingum í íþróttaskóla HSV. Fjölmarginir iðkendur hafa náð prýðilegum árangri og verið valdir í landsliðsverkefni. Um starf deildanna vísast að öðru leyti í starfsskýrslur þeirra sem finna má á heimasíðu

5. Lagðir fram endurskoðaðir ársreikningar félagsins.

Guðni Guðnason gjaldkeri Vestra, lagði fram endurskoðaða ársreikninga sem samþykktir hafa verið af skoðunarmönnum félagsins. Hann fór yfir helstu lykiltölur í

rekstri félagsins. Reikningarnir lágu frammi fyrir fundarmenn til skoðunar og opnaði á umræður um þá. Engar umræður urðu um reikningana og bar fundarstjóri þá upp til samþykktar. Voru þeir samþykktir í einu hljóði.

6. Ákvörðun félagsgjalds.

Á síðasta aðalfundi var ákveðið að árlegt félagsgjald yrði 2000. Guðni Guðnason, gjaldkeri félagsins, bar fram tillögu að það yrði óbreytt. Hann greindi frá því að það hefði staðið til að byrja að innheimta gjaldið á liðnu ári en því miður hefði ekki orðið af því. Undirbúningur væri hins vegar hafinn og ætlunin að koma þessu á hið fyrsta. Ítrekaði hann að horft væri til eldri félagaskráa deildanna en þetta væru um 2000 félagar, iðkendur væru sjálfkrafa félagar og ekki innheimt gjald af þeim.

7. Fjárhagsáætlun lögð fram til samþykktar.

Fundarstjóri gaf Guðna Guðnasyni gjaldkera orðið. Hann fór yfir helstu tölur og fundarstjóri opnaði síðan fyrir umræður. Tillagan borin upp til atkvæða og samþykkt.

8. Lagabreytingar.

Sigurður Hreinsson gerði grein fyrir tillögum stjórnar um breytingar á lögum félagsins. Fyrst bar hann upp tillögu um að samþykkja inngöngu hjólreiðadeildar í félagið. Fundarstjóri opnaði á umræður um tillöguna og til máls tók formaður, Hjalti Karlsson, sem lýsti yfir ánægju sinni með fjölgun deilda í félaginu og sagði öll formsatriði vera frágengin. Þórdís Sif, formaður stjórnar hjóladeildarinnar, tók síðan til máls og greindi frá skipulagi og starfsemi deildarinnar jafnframt því sem hún lýsti yfir ánægju sinni og annarra sem að deildinni stæðu, með fyrirhugaða inngöngu deildarinnar í Vestra. Fundarstjóri bar því næst upp tillögu um að hjólareiðadeildin fengi inngöngu í Vestra og var það samþykkt í einu hljóði.

Fór Sigurður því næst yfir þær breytingar sem stjórn lagði til að gerðar yrðu á lögum félagsins:

Í 2. grein komu loks ákvæði um merki félagsins og aðalliti þess.

Úr 10. grein voru tekin út ákvæði um aukaaðalfund. Ekki er talin þörf á þeirri heimild þar sem félagsfundir geta fjallað um öll þau atriði sem aukaaðalfundur hafði heimild til.

Ákvæði í 12. grein, sem fjallar um fjölda stjórnarmanna, var löguð að þeirri stefnu að vera með sjö manna stjórn.

Í 14. grein var bætt inn ákvæði um hjólreiðadeild.

21. grein er ný inn í lögnum og fjallar hún um trúnaðarmann og viðbragðsteymi.

24. grein er um gildistöku og þar kom inn dagsetning þessa aðalfundar.

Þá var fellt út bráðabirgðaákvæði sem þurfti vegna kosningar á stofnfundi.

Fundarstjóri lagði til að allar framlagðar lagabreytingar yrðu samþykktar í einum pakka og voru fundarmenn sammála því. Bar fundarstjóri upp tillögu um breytingar á lögum félagsins og var hún samþykkt.

9. Kosningar.

a) Kosinn formaður.

Tillaga um Hjalta Karlsson. Samþykkt með handauppréttingu.

b) Kosnir þrír stjórnarmenn til tveggja ára í senn.

Tillaga um Guðfinnu Hreiðarsdóttur, Sigurð Jón Hreinsson og Jónu Lind Kristjánsdóttur. Samþykkt með handauppréttingu.

- c) Kosnir tveir varamenn til eins árs í senn.
Tillaga um Jónas Gunnlaugsson og Þorstein Þráinsson. Samþykkt með handauppréttingu.
- d) Kosnir tveir skoðunarmenn reikninga og einn til vara.
Tillaga um Ingimar Halldórsson, Ásdísi Birnu Pálsdóttur og Gísli Úlfarsson til vara. Samþykkt með handauppréttingu.
- e) Kosning fastra nefnda er aðalfundur ákveður. Engar tillögur um fastar nefndir liggja fyrir fundinum.

Fyrir voru í stjórn og sitja eitt ár til viðbótar: Guðni Guðnason, Gísli Jón Hjaltason og Sólrún Geirsdóttir.

10. Önnur mál.

Birna Lárusdóttir bar upp nokkur mál. Fyrst nefndi hún fréttáflutning af starfsemi félagsins og taldi að hann þyrfti að bæta, einkum hvað varðar fréttir af sameiginlegum málum félagsins enda flestar deildirnar duglegar að segja frá sínu starfi. Þá nefndi hún að bæta þyrfti aðstöðu í íþróttahúsinu á Torfnesi fyrir börn og unglinga sem eyða þar talsverðum tíma í að bíða, annað hvort eftir æfingum eða eftir að komast heim, ekki síst þau sem eiga um langan veg að fara. Einnig nefndi Birna þörf að að koma upp hirslum eða sýningarskápum á Torfnesi undir verðlaunagripi félagsins. Þá minntist hún á komandi ÍSÍ þing þar sem m.a. verður til umræðu tillaga um að nauðsyn þess að kanna möguleika á að koma upp gistiaðstöðu á höfuðborgarsvæðinu fyrir landsbyggðarlið í æfingar- og keppnisferðum.

Formaður, Hjalti Karlsson, gerði grein fyrir vinnu við viðbragðsáætlun, siðareglur og gildi og jafnréttisáætlun. Hann hefur kynnt þessa vinnu og afrakstur hennar á aðalfundum deildanna. Að umræðum loknum bar fundarstjóri upp til samþykktar: 1. Jafnréttisáætlun 2. Siðareglur og gildi og 3. Viðbragðsáætlun. Samþykkt af fundarmönnum.

Engin önnur mál borin upp.

11. Fundarslit.

Fundarstjóri bar upp tillögu um að fundarstjóra og ritara yrði farið að ganga frá fundargerð sem síðan yrði birt á vefsíðu Vestra. Samþykkt samhljóða. Formaður þakkaði fundarmönnum fyrir komuna og sleit fundinum kl. 21.10